

茶
香
室
叢
鈔

茶香堂續鈔卷二

德清俞樾

野狐嶺去天十八里

明楊慎升庵集云童瑄號玉壺以明天文召入扈從成
祖北狩至野狐嶺上有碑識云嶺去天十八里其寒裂
膚此地極北紫微北斗已向南觀

嶺中地勢極高

國朝陳鼎滇黔紀遊云自湖南辰沅以西皆自下而上
至鎮遠趨貴陽俱上大山斗峻險絕之坡指不勝屈至
定西嶺嶺在白崖西北白崖則在大理府之東南其地高中州千有餘里去

天尺五黑夜星光照耀如晝天如覆盆伸手可捫身躡履地自覺憑虛至永昌騰越直入霄漢矣

宋袁文鸞牖閒談云余自幼聞長老言京師地方與泗州塔尖等泗州塔一十三級每級高一丈是京師地形比泗州高十三丈今筆談所載乃云京師之地比泗州高一十九丈四尺八寸六分其數細計如此按宋都汴梁與泗州不為甚遠而已懸絕如此則輿中地勢之高固不足怪也

黃河入暹羅

國朝季麒光臺灣雜記云暹羅國民俱造高樓云其地

通黃河四月水至皆黃色王亦徙居遠山民盡登樓以處牛羊犬豕亦畜於樓上人則乘舟往來蔬薪之屬以示舟貿易夫黃河發源崑崙北行入龍門皆在西徼今又南注於暹羅之域豈其地與星宿海相連而河流出此入海乎抑行於中國者又別一道乎

大理卽佛國

國朝陳鼎滇黔紀遊云唐乾德二年詔沙門三百人入天竺求舍利至開寶九年始歸其記錄行程曰魏峯曰鷲足山曰優婆掬多石室曰王舍城曰鷲峯曰阿難半身舍利塔曰畢鉢羅窟以今考之皆大理古跡也蓋當

日由西番行入天竺而轉東以達大理者緣南詔爲蒙
氏地而黔蜀之道不通也然則世所謂佛國者卽在滇
南矣

峒夷疑卽今倭國

國朝沈濤銅鬘斗齋隨筆云堯典宅峒夷史記作居郁
夷郁岫一聲之轉詩周道倭遲韓詩作郁夷見漢書地
理志注郁與倭聲亦相近也今倭國在海東或卽古郁
夷乎

俄羅斯古羅刹國

國朝俞正燮癸巳存稿有一文辨羅刹俄羅斯異同云

羅刹者紅毛諸番其正名羅刹國者今之俄羅斯其國東北自黑龍江邊外北盡北海西盡西海西南包額納特珂克外羅刹種人素與佛不合自立天主教其部強盛當佛時羅刹王名阿修羅欺凌佛并欺凌佛國佛國深畏之遇惡人惡物皆以羅刹名之故有在山羅刹有在海羅刹有飛天羅刹皆假名羅刹而於真羅刹無與也羅刹至今俄羅斯而極大潛邱劄記言俄羅斯定非羅刹閭蓋畧見佛書不能詳悉且俄羅斯自稱爲羅刹何得謂之定非也

阿含經云昔有貧人渡河爲水所漂殆死得出時有辟

支佛詣舍乞食懽喜施竟騰空飛去貧人發願願我後
身長大一切深水無過膝者以是因緣爲阿修羅得極
大身四大海水不能過膝立于海中身過須彌阿修羅
有四種類若于鬼道以護法力成通入空此從卵生鬼
趣所攝若于天中降德貶墜其所卜居鄰于日月此從
胎出人趣所攝有修羅王執持世界力洞無畏能于釋
梵四天爭權化身大小隨意能作此因變化而有天趣
所攝下劣修羅生大海心且游虛空暮歸水宿此因濕
氣而有畜生趣攝按長言之曰阿修羅短言之曰羅刹
梵音無定耳俞理初謂當佛時羅刹王名阿修羅猶未

達其義

國朝陸鳳藻小知錄引起世經云須彌山東大海下有
鞞摩質多羅阿修羅王國土南大海下有踴躍阿修羅
王宮殿西大海下有奢婆羅阿修羅王宮殿北大海下
有羅喉羅阿修羅王宮殿然則凡四方強悍之國佛皆
謂之阿修羅非止一國矣

六字地名

明楊慎升庵集云往年在史館時有湖廣土官水盡源
通塔平長官司進貢蓋六字地名有司列疑爲三地名
添之云三長官司予取大明官制證之曰此一處非三

地也

四山爲嵯

明葉向高說類云初至嵯縣問嵯字之意一庠生云四山爲嵯如四馬四矢之義問其所出云聞之前輩不知也偶閱蘇州志齊張稷爲剡令至嵯亭生子因名嵯字四山以此命字必有出也按說類爲葉向高與林茂槐共成之書每條必注所出此獨不注殆葉氏自述所見耳

卡

國朝鈺琇觚賸云粵中多俗字如穩坐爲奎音穩人物

之短者爲喬音矮人物之瘦小爲莠音芒山之巖洞爲
𡵓音勘水之磯激爲泵音聘蓄水之地爲𡵓音甘通水
之道爲圳音浸水之曲折爲𡵓音囊路之險隘爲卡音
汊按此數字惟卡字今盛行軍興以來抽釐佐餉名其
所曰卡上自 詔書下而章奏無不有此字不知在
國初時猶與𡵓泵等同爲俗字也

土脈橫豎

國朝高士奇天祿識餘云土脈有橫豎許穎閒田有豎
土者不可稻以其不停水陝以西民皆穴土而居亦曰
此橫土可劖若遇豎土卽坍塌矣

小島無根

南懷仁坤輿外紀云諸厄利亞國有小島無根因風移動人弗敢居按此則列子所載殆非寓言

浮田

國朝翟漱芳仰山堂集云由桃花潭上溯二十里而遙曰考溪俗名黃精鵠蓋由黃山天都峰劈脈至此聳出黃梅高峯爲考溪一方之鎮復分左右兩支其閒有田千畝曰浮田以其土浮水上水沈土下得名其土色黑性柔厚不過數寸其水有翰墨香深不可計蝦魚畜焉田無阡陌插竿識之其藝法農兩腋挾竿入水半沈半

浮手翻其土遂以插秧穰亦如之秧下後不須芸草旱
潦皆有收雨少尤豐米色赤性黏有雁來紅鷄冠赤等
名然以他土投此水則沈以此土投他水亦沈相傳舊
爲錢氏居後地陷遂成田按此地當在甯國府涇縣今
未知尙有此田否

國朝高士奇天祿識餘云廣州新會縣蜆岡以南瀕海
人有疏圃乃撻水中積沙而成者或爲大風飄去若浮
筏然番禺嘗有人訟失去蔬圃爲人所匿在百里內外
蓋其事也載玉堂閑話按此亦浮田之類

宋吳曾能改齋漫錄云國初范質閒話云廣州番禺縣

嘗有部民牒訴云前夜亡失蔬圃今認得在某處請判
狀往取有北客駁其說因詰之民云海之淺水中有藻
苻之屬被風吹沙與藻苻相襍其根旣浮其沙或厚三
五尺處可以耕墾或權爲圃夜則破盜者盜至百餘里
外若苻筏之乘流也楊文公談苑云兩浙有葑田葑湖
上有菱葑所相纏結積久厚至尺餘可植蔬種稻或割
而賣與人乃知葑之爲田爲圃廣浙皆有之

郭璞江賦云標之以翠翳泛之以遊菰播匪藝之芒種
挺自然之嘉蔬鱗被菱荷攢布水蘋翹莖漠蕊擢穎散
裹隨風猗菱與波潭拖疑亦此類也

明楊慎升庵集云葑田江淮以南有之菰葑根相結而生歲久浮於水上根最繁而善糾結以土泥著上刈去其蔓枯時以火燎便可耕種吳闕駟十三州志云百粵嶺南有駱田駱音架王氏農書架田卽葑田以木縛架爲曲田浮水面以葑泥附木上而成田其田隨水上下故南方有盜田之訟也

又楊慎藝林伐山云雲南謂之海葑

混柱

宋沈括夢溪筆談云錢唐江錢氏時爲石隄隄外又植大木十餘行謂之混柱寶元康定間人有獻議取混柱

可得良杉數十萬杭帥以爲然旣而舊木出水皆朽敗不可用而滉柱一空石隄爲洪濤所激歲歲摧決按滉柱之制今不可復并無知其名者矣

古喇水

明沈德符野獲編補遺云大古喇亦稱宣慰不在雲南六宣慰司中今禁中諸香極重古喇水爲眞龍涎之亞卽其國所產歐陽永叔歸田錄云西南夷法錦有鬻至中國者其上織梅舜俞春雪詩其地卽古刺亦名古刺錦殆謂是歟接近時袁子才隨園詩話曾及古刺水而不知爲何物觀此始明又人知有古刺水不知有古刺

錦今亦未聞有是也

國朝陸祚蕃粵西偶記云古辣泉在永清之墟取以釀酒埋之土中日足取出色淺紅味甘不易敗

盪江

玉篇水部盪字注云屋姑切盪江項羽渡船處也按今人知有烏江不知盪江之名

廣韵十一模烏盪並哀都切盪下注云盤盪旋流也則盪江疑以旋流得名

劉李河

國朝高士奇扈從西巡日錄云琉璃河宋王曾奉使錄

作劉李河金史亦同蓋因劉李二姓居之河以是名今
訛曰琉璃河按余昔年奉派恭詣

慕陵隨同行

禮曾渡此河有詩存集中不知其爲劉李河也

文文山指南後錄有渡琉璃橋詩似此河以琉璃名亦
已久矣

五雲谿

國朝王士禎居易錄云越中若邪谿亦云若耶邪于遮
切宋九域志云徐浩遊若邪谿曰曾子不居勝母之閭
吾豈遊若邪之谿因改爲五雲谿是讀作邪正之邪類
惡谿矣按五雲谿之名甚新今越人不知有此名矣

又按徐浩語以若邪與勝母並稱正讀于遮切蓋讀如
爺也母不可勝父豈可若改易其名漁洋此條殊未達
古語矣

王半山詩洲迴藏迷于溪深礙若耶以迷子洲對若耶
溪得其義矣楊升庵云迷子洲在建康西南四十里

鴈泉

國朝陸祚蕃粵西偶記云泗洲城有鴈泉常日無水游
者與牧童錢數文求飲牧童叫呼鴈鴈拍手頓足泉即
流出游者取酌之甚甘美飲畢即竭

按國朝閔敘粵述云犀泉在縣東北

謂富川縣

石坎陳丈

餘人至視之無有也拍手呼之則出不移時而滿旋復
消涸余疑罵泉亦此類但聞人聲則出耳泉水固不解
人語不知罵不罵也乃相沿以惡聲相向遂使泉得罵
名冤矣

國朝陳鼎滇黔紀遊云安平縣有喜客泉客至則湧如
沸客去則否按此疑亦聞人聲而湧也

取第一泉水

國朝趙吉士寄園寄所寄云金山郭墓下江心泉爲天
下第一然有龍窩洄流甚急相傳泉爲龍所禁不敢汲
康熙己巳六月余避暑山之七峯閣命寺僧擎四舟相

連若井抵洄流用繩沈錫桶桶上開五眼線繫木屑塞之無令濁水入下沉十數丈到底方拔線提起木屑則真泉入矣三沈其桶江波大作予急回岸烹泉與僧共飲清香透骨非復人間味越數日復拏舟繫墓畔意欲取水風濤掀翻棹不可泊如此者三謂之龍禁信然

仙人塘石壁字

國朝許繼曾東還紀程云未至沅州二里有仙人塘江左石壁森秀竹樹青蔥壁上題四字似古文篆籀云是仙人所題人莫有識者按此與余叢鈔卷九所載蒼頡二十八字永福仙篆十字皆相類也

國朝無名氏述異記云離分宜縣一二十里臨江山壁有大石似碑長可二丈闊可七尺就山上鑿成上下四旁皆山石也上有楷書四行每行八字筆畫模糊不能盡讀相傳碑下江中有仙人遺下金船七隻滿載金寶枕此水底此碑乃仙人遺筆有能盡讀碑字則七船浮露以贈曾有人讀至三十字七船之帆檣盡露因二字不能讀復沈水底按此則近於誕妄聊佐笑談耳

石壁字下移

國朝王士禎池北偶談云永新縣禾山寺傍有顏魯公書龍濱二大字數百年來石壁如故而二字每年輒徙

下今離地不二尺矣

紅螺玉帶

明陳吳才萬松閣記客言曰饑內有紅螺玉帶二山士夫餞別或賀承恩寵者多以此作詩題曰紅螺春色玉帶生光是也按此卷所紀皆燕京故事今不聞有此語矣

顧況仙遊記

宋王象之輿地碑記目云唐著作顧況仙遊記曰温州人李庭等大厯六年入山斫船迷不知路逢見潌水潌水者東越方言以挂泉爲潌中有人煙雞犬之候尋聲

渡水忽到一處約在甌閩之間云古莽然之墟者好田
泉竹果藥連棟界險三百餘家四面高山迴環深映有
象耕雁耘人甚知禮有鳥名鴈飛行如鶴入人社中惟
祭得殺無故不得殺殺令地震有一老人爲眾所伏容
貌甚和歲人數百匹布以備寒暑乍見外人亦甚驚異
問所從來袁晁賊未平時政何若具以實告因曰願來
就居得否云此閒地窄不足以容爲致食飲申以主敬
旣而辦行砍樹記道還家及復前蹤羣山萬首不可尋
省按此亦一桃花源矣

黃帝殿基

國朝吳寶崖曠園禠志云涿州涿鹿驛前街百步許終日車行其上曾無轍迹相傳爲軒轅黃帝建都時舊殿基

堯行宮行臺

太平御覽引宋王韶之始興記云淘水源有堯山山下有平陵陵上有古大堂基十餘處謂曰堯故亭父老相傳堯南巡登此山故亭卽其行宮

又初學記引始興記云含洹縣有堯山堯巡狩至於此立行臺也按此則行臺乃古帝王巡狩所居今仕宦借其名僭矣

堯廟二松

國朝吳寶崖曠園禠志云慶都縣北關外有堯廟二古松同根一分三幹一垂五鬣廟有柱銘三皇一本五帝同根八隸字松之形實肖之

善卷山

國朝許纘曾東還紀程云善卷山堯時善卷讓位避居於此今孤峯絕頂有善卷先生古壇旁有白龍井與山下潭水相通其下爲枉渚卽楚詞所謂朝發枉渚夕宿辰陽者也枉渚爲善卷先生釣灣其村亦曰善卷村沅江至此如一砥柱過此則百里平疇直趨洞庭矣按此

則善卷殆楚人也

丹朱陵

國朝吳寶崖曠園稌志云慶都東門外有丹朱陵縣令錢某啟墓丈餘覆一方石石有小孔如錢大以物投其中則有聲莫測其底旣而大雷忽起墓下錢驚怖置鋪止移其石立墓上石側三篆字不可識按墓中置石石側刻字此卽志墓之權輿矣

海鹽齊景公廟

宋主象之輿地碑記目云齊景公廟碑在海鹽縣齊景鄉唐正元十四年汝南縣君周氏墓誌銘附於嘉興縣

東界海鹽縣齊景鄉按海鹽縣乃有齊景公遺蹟亦奇

范蠡泛湖船

國朝無名氏述異記云康熙四十一年嘉興開河新橋下開出船一隻深埋河底不敢掘而止金明寺范蠡湖內亦有船一隻半在城內半在城外鴛鴦湖相傳范大夫泛湖之船也

司馬子長墓

國朝王士禎池北偶談云比部張蓮峯說韓城有蘇屬國司馬子長二墓蘇墓樹枝皆南向司馬墓樹枝皆北向驗之良然司馬墓北向理不可曉按蘇墓已載於叢

鈔卷十六矣今又得司馬墓事併載之

青冢無草木

國朝宋犂筠廊偶筆云嘉禾曹秋岳先生嘗至昭君墓墓無草木遠而望之冥濛作朦朧色古云青冢良然墓前石案刻某閼氏之墓爲蒙古書按世傳昭君墓草獨青故謂之青冢今觀此則知青冢非以草色見也

國朝王士禎居易錄云陳給事言明妃冢在歸化城南三十里高三十餘丈廣數畝冢前尙存石虎二其色黝黑石獅子一色純白幢一上刻蒙古書豎幡其上冢巔有小方亭中藏畫佛冢傍大柳一株根分爲二相距三

尺許去地數尺連而爲一骨去皮存若香片然按此言明妃冢甚詳而不言遠望冥濛之色則猶未備也

無鹽冢

明沈德符野獲編云嘉靖八年山東臨朐縣有大墓發之乃古無鹽后陵寢其中珍異最多生縛女子四人列左右爲殉其尸得寶玉之氣尙未銷按此則無鹽醜婦明人及見其貌矣

昭君祖冢

宋王象之輿地碑記自歸州有古松枝碑在高陽鄉朱家村碑在樹上去地十許丈相傳云昭君祖冢碑按昭

君之祖不知何名情未載其文此碑名松枝又在樹上
豈卽於松枝閒刻文字乎

嚴子陵墓

國朝周亮工書影云嚴子陵墓在懷慶城東七里

譙周墓

明朱國禎湧幢小品云四川南充縣署有譙周墓自晉
以來無敢動者嘉靖中太守袁光翰徙之爾後頻見緋
衣貴人出入縣尹至者輒不利按譙周之墓至明代尙
有靈爽亦可怪矣

駱賓王墓

明朱國禎湧幢小品云曹某者鑿靛池於海門城東黃泥口忽得古冢題石曰駱賓王之墓啟棺見一人衣冠如新曹驚訝隨封以土按千年啟冢衣冠儼然則遁迹爲僧之說不足信矣

丁謂墓

國朝董含蓴鄉贅筆云江右李劍墟言星子縣有夏憲副應台者以所居隘屋後有古墓欲徙之夜夢一貴人登堂揖曰予宋之丁謂也公宅後墓乃我塋祈勿毀副憲驚寤語其子曰丁乃巨奸令其人在尙當殛之況冢乎遂徙之冢有三穴左右俱空中穴一槽如新欲毀之

其子力諫移之高原不遵旬夏病卒按丁謂之墓不應在江西此不可曉也

莫愁村

國朝許纘曾滇行紀程續鈔云漢江之西有莫愁村廬家有女名莫愁善歌舞嘗被召入楚宮詢土人曰村在蔓草中莫識其處按此則莫愁乃楚女也

明張萱疑耀云莫愁樂古樂府及唐書樂志樂府解題皆謂出於石城樂以石城有女子名莫愁也石城皆謂金陵之石頭城宋曾三異以石城在楚郢中漢江西岸至今有莫愁村又云曾見莫愁之像有石本衣冠甚古

乃古之神仙者流非女子也石城卽古竟陵今金陵莫
愁湖在三山門外相傳有妓盧莫愁家此或後代倡女
慕莫愁名好事者因其人以名湖而竟陵與金陵石城
與石頭城又易訛也卽金陵有莫愁當是兩莫愁矣又
樂府解題云古歌有莫愁洛陽女則是有三莫愁矣

顧野王硯池

明郎瑛七修類稿云松江華亭縣亭林鄉乃梁顧野王
所居之地今寶林寺是也尙像野王爲伽藍硯池之水
早清中綠晚則黑亦寄也

流觴曲水

國朝惲敬大雲山房襟記云峽江蕭山寺志載蕭子雲舊居有流觴曲水按令人止知蘭亭有流觴曲水不知有此

柳書羊茂二臺

國朝王士禎居易錄云東阿魚山卽曹子建聞梵處有墓在焉山上有臺二曰柳書曰羊茂皆傳爲子建讀書處二臺名義不甚可解

按柳書羊茂二臺注皆云見隋碑乃本書卷二十載隋開皇十三年碑但云營墓魚山傍羊茂臺平生遊涉有終焉之所無所謂柳書臺者未詳所據

韓魏公榮歸堂

宋強至祠部集有榮歸堂二首注云公以詔語名堂按此詩在韓魏公生日二首之後所謂公卽韓魏公也今人知魏公有畫錦堂而榮歸堂之名不著

祠郡集又有安正堂二首末云今日正風傳魏國平居詩思亦無邪安正堂亦魏公堂名

白礬樓

宋吳曾能改齋漫錄云京師東華門外景明坊有酒樓人謂之樊樓或者以爲樓主之姓非也本商賈鬻礬於此後爲酒樓本名白礬樓按樊樓之名甚著白礬樓之

名則無知者

儂智高冢在大理

國朝陳鼎慎黔紀遊云狄青討儂智高史稱智高遺金龍衣而遁不知所終殊不知其終於大理也今其宅遺冢尙存

蕭后梳妝樓非遼蹟

國朝張爾岐蒿庵閒話云江陵集云皇城北苑中有廣寒殿相傳以爲遼蕭后梳妝樓萬厯七年五月四日忽自傾圮其梁上有金錢百二十文蓋鎮物也上以四文賜余其文曰至元通寶至元乃元世祖紀年則殿創於

元世非遼時物矣江陵此說甚足信而志帝京景物略者固公鄉人猶遺此證據何也

倪元鎮故居

國朝王士禎居易錄云梁溪門人秦道然言倪元鎮故居今爲祇陀寺在無錫縣東南二十里所謂雲林堂清閨閣故址皆在元鎮之族今爲鄉世以貨殖貴雄里中

張王基三異

明劉泌壘起襍事云張王基本舊治也大亂後百餘年來忽有三異生一草結實如小紅豆夜則開之以承露人取飲之百病自愈人呼爲天膏一異也其根可以爲

厨料置飲食中盛暑不敗二異也一男子陰囊大如斗
陝西大賈買去俟其死破囊得二玉椀三異也按其地
今稱王廢基絕不聞有此草矣

海忠介石坊

國朝吳寶崖曠園襍志云瓊州海忠介公瑞以直節經
濟顯嘉隆閒崇禎甲申三月公石坊鐫名處泚然血下
拭已復出至十九日乃止公沒已百餘年海濱萬里與
君國存亡冥通呼吸亦神奇之至矣

吳中調豐巷

國朝錢大昕竹汀先生日記云張芑堂來言宮巷口小

塔記其甌悉爲人取去有賣磁盃者得其一有隆興二年字驗之乃虞氏婦傅氏妙喜爲亡夫資冥福而作其地名條坊巷今譌爲調豐矣吳中古刻殊少揭而記之
蘇州感勝寺柏堂

國朝沈德潛歸愚文鈔樾亭上人傳云婁門感勝寺有千餘年柏久枯萎骨如龍虎狀旁獨秀一枝青青垂二百年有上人廬其下以柏名堂人卽以柏堂稱之上人名岑霽字曉初又字樾亭俗朱姓按杭州西湖柏堂人皆知之光緒初蔣公祠落成余於其旁屋書柏堂二字榜以存古蹟至蘇州感勝寺有柏堂知者甚鮮今亦未

知此獨秀之枝尙存否也

三潭印月真蹟

國朝陸次雲湖壖襍記云三潭印月者西湖十景之一
嘗披舊圖見繪三小塔懸一月影於中余疑月光所印
何獨三潭今塔久廢更無從識潭之所在矣順治壬辰
春登教場山絕頂下盼湖中有三大圓暈見於放生池
之左側詢之山僧僧曰此所謂三潭印月也因悟印月
之說謂其似月而非眞月向之畫工大誤矣按此則知
三潭印月在放生池之左乃所謂放生池者今亦不能
實知其所在而湖壖襍記又有放生池一條云放生池

稱魚樂園又有廬舍庵前深淵一畝爲池附庸然則放生池必與廬舍庵相近余所居之俞樓卽在廬舍庵之右三潭印月真蹟當近俞樓而彭雪琴尙書所築之退省庵雖名爲三潭印月轉非其真矣記於此質之雪翁兩親家效爭墩故事可笑也

南宋大內有飛來峯

元周密乾道起居注云官裏知太上聖意不欲頻出勞人命修內司於北內後苑建造冷泉堂疊巧石爲飛來峯開展大池引注湖水景物並如西湖按此知南宋時曾於城中疊石爲飛來峯今無復遺迹矣乃有尋常市

僧之家疊石爲山亦幾欲與飛來爭勝甚無謂也

靈隱犬冢

國朝周亮工書影云太平廣記云靈隱造北高峯塔有寺犬自山下銜磚石至嶺上吻爲流血人憐之乃繫磚其背塔成犬斃寺僧葬之寺門八面松下今靈隱寺志不載此事

茶香室續鈔卷三

德清俞樾

神禹生日

國朝鄺滋德越中青梅詞注引會稽志云三月五日常俗傳神禹生日

按東坡上巳游塗山荆山詩可憐淮海人尙記弧矢旦自注云淮南人謂禹以六月六日生是日數萬人會山上雖傳記不載然相傳如此是禹生日有二說

鸞熊爲夏宗伯

明楊慎升庵集云唐天寶六載詔祀夏禹於安邑以宗

伯鬻熊秩宗伯夷配此夏之鬻熊也事夏禹爲宗伯經傳無文不知何據按人知鬻熊爲周文王師不知又有此鬻熊

岐伯能詩

國朝周亮工書影云短簫饒歌軍樂也黃帝使岐伯所作所以建武揚德風勸戰士也右見古今注岐伯醫外能詩古聖何所不備

孔子諱宜改讀期音

國朝葉名澣橋西襍記云雍正三年上諭孔子諱理應迴避令九卿會議九卿議以凡係姓氏俱加卩爲

邱凡係地名皆改易他名書寫常用則從古體作丘
上諭今文出於古文若改用丘字是未嘗迴避也此
字本有期音查毛詩古文作期音甚多嗣後除四書五
經外凡遇此字並加卩爲邱地名亦不改易但加卩旁
讀作期音庶乎允協足副尊崇 先聖至意謹按加卩
作邱至今遵行至讀期音則世無知者宜申明之也

子貢至孝

國朝喬松年蘿蘼亭札記云任昉王文憲集序山庭異
表李善注引論語摘輔象曰子貢山庭斗繞口故子貢
至孝經傳無言子貢孝者僅傳斯語

按王文憲集序淵角殊祥山庭異表注於淵角句引論語撰考議曰顏回有角額似月形淵水也月是水積故名淵此亦異聞然淵是字非名也

匡人伯氏

國朝洪亮吉曉讀書齋四錄云論語子畏於匡何晏集解及史記孔子世家皆止云匡人惟說苑韓詩外傳及王肅所造家語以爲匡簡子奪伯氏駢邑三百孔安國注及史記亦止云伯氏齊大夫獨皇侃論語疏以爲伯氏名偃皆當有所本而今無考按國朝程大中著四書逸箋亦未知此二事

百里奚爲虞公之族

國朝洪亮吉曉讀書齋二錄云南史明僧紹傳其先吳太伯之裔百里奚子孟明以名爲姓因悟百里奚與虞公本同大宗按孟子但言虞人近人乃推其爲虞公之族然其說自塙

宛春爲廬州人

國朝洪亮吉北江詩話云左傳僖公十三年城濮之戰傳言執宛春以怒楚今廬州府志載宛春爲廬州人不知何據

顏讎由爲子路妻兄

國朝劉書年經說云史記言孔子適衛主子路妻兄顏濁鄒家索隱謂與孟子不合余謂史公以顏濁鄒爲子路妻兄正據孟子此文非別采自他書古蓋讀彌子之妻與子路之妻兄弟也爲一句言讎由爲二妻之兄弟也觀小司馬云云知後世誤讀自唐已然按依此解之則孟子與史記合且可知彌子之妻子路之妻並顏氏也此說可從

閔子或言宿州人

國朝王士禎居易錄云閔子宿州人州有窩山閔子祠
齋孫奉祀

國朝翁方綱元遺山先生年譜載先生濟南行記云鄒平之南有長白山范文正公學舍在焉東十里有南北兩妙山兩山之閒有閔子騫墓然則閔子之祠不應在宿州也

王豹非衛人

國朝劉書年經說云王豹趙注謂衛之善謳者豈以淇水在衛因處淇而卽謂之衛人邪左氏哀六年傳齊公子陽生之立殺王甲拘江說囚王豹於句賣之邱杜注三子景公嬖臣荼之黨以時代考之於髡所稱似屬一人意者豹以善謳爲景公所嬖悼公立囚而未殺後遂

奔衛處淇則豹實齊人也髡語皆盛誇本國之人如髡
駒華周杞梁皆齊人不應羣一衛人愚按說文謳齊歌
也髡言王豹處於淇而河西善謳是謂河西之人皆善
齊歌則王豹爲齊人此亦一證矣

國朝洪亮吉曉讀書齋四錄云趙岐孟子注王豹衛之
善謳者蓋亦無所據以處於淇故謂之衛人耳今攷淇
水自廣宗縣以下已與齊接畛則淇非盡屬衛也左傳
哀公六年囚王豹於句賁之邱杜注云景公嬖臣則孟
子所云王豹或卽此

越象

明楊慎升庵集云王符潛夫論由余生於五狄越象產
於八蠻而功施齊秦德立諸夏越象事載籍不見
按史記鄒陽傳云秦用戎人由余而霸中國齊用越人
蒙而彊威宜則越象當作越蒙

商瞿上

明楊慎升庵集云孔子弟子商瞿世本作商瞿上文翁
石室圖亦作商瞿上景文公作成都先賢贊以商瞿上
爲蜀人攷之路史及輿地記瞿上城在雙流按世知商
瞿不知商瞿上且商瞿魯人亦莫知其爲蜀人也

王子期

明楊慎升庵集云韓非子曰王子期爲趙簡子御子期
王良字也

孟子生卒

明都穆聽雨紀談云予嘗觀孟氏譜孟子周定王三十
七年四月二日生卽今二月二日赧王二十六年正月
十五日卒卽今十一月十五日壽八十四鄒邑里人至
今遇冬至日廢賀節之禮有自來矣

聽雨紀談又云譜言孟仲子名軾孟子之子也四十五
代孫甯曾見一書於嶧山道人曰公孫子內有仲子問
篇乃知孟仲子實孟子之子從學於公孫丑者

漢高帝生日

國朝王士禎居易錄云滁州豐山有漢高帝廟偶讀老學庵筆記見所錄碑陰略云滁之西曰豐山有漢高帝廟至今土俗以五月十七日爲高帝生日遠近畢集薦肴觴焉

公孫宏字次卿

明楊慎升庵集云漢鄒長倩與公孫宏書山川阻修加以風露次卿足下勉作功名竊在下風以俟嘉譽公孫宏字次卿惟見此漢書不載按鄒長倩書見西京雜記

孫堅父名

宋韓滉澗泉日記云孫堅父名鍾其墳在縣南陽平山高一丈周四十步按三國志孫破虜討逆傳言堅少爲縣吏年十七與父共載船至錢唐而不言其父何名此可補史之闕

諸葛孔明封武靈王

宋王象之輿地碑記目襄陽府有唐改封諸葛亮爲武靈王廟記注云唐光化五年封諸葛孔明爲武靈王今在隆中按孔明身後有武靈王之封世罕知之光化乃唐昭宗年號也

任靖

國朝梁章鉅浪跡叢談云紀文達師曰右軍襍帖任靖代書蓋靖學書於右軍後大令又學書於靖也事見陶宏景與武帝論書啟此事人多不知歷代書家傳記亦佚其名蓋不幸而湮沒耳

按張天如百三名家中陶隱居集無此一條但有云給事黃門一紙治廉漑一紙凡二篇并是謝安衛軍參軍任靖書又一啟云逸少自吳興以前諸書猶爲未稱凡厥好迹皆是向在會稽時永和十許年中者從失郡告靈不仕以後略不復自書皆使此一人世中不能別也見其緩異呼爲末年書逸少亡後子敬年十七八全放

此人書故遂成與之相似今聖目標題足使眾識頓悟於逸少無復少年之譏按所謂此人者竟不知何人以紀文達語證之殆卽任靖歟

梁武帝集有答陶宏景論書書云給事黃門二紙爲任靖書

陸法言一名慈

國朝俞正燮癸巳存稿云唐藝文志有陸慈切韻五卷疑法言一名慈按陸法言一名慈世未有知者

李磻梁浩

明何孟春餘冬敘錄云司空圖撰李磻行狀稱美其著

述甚至而惜其焚於賊火無聞於時孫光憲言唐代韓愈柳宗元泊李翱數君子所宗仰者唯梁浩補闕而梁聲采寂寂文章之美理當傳世其獲傳與否又自有幸不幸者今昔所歎不獨李礪梁浩而已

武后賜狄仁傑袍金字

宋吳曾能改齋漫錄云新唐書狄仁傑傳后自製金字十二於袍以旌其忠其十二字史不著予按家傳云以金字環繞五色雙鸞其文曰敷政術守清勤昇顯位勵相臣

韋應物少年無賴

宋洪邁容齋一筆云韋蘇州集中有逢楊開府詩云少
事武皇帝無賴恃恩私身作里中橫家藏亡命兒朝持
檇蒲局暮竊東鄰姬司隸不敢捕立在白玉墀驪山風
雪夜長楊羽獵時一字都不識飲酒肆頑癡味此詩蓋
應物自敘其少年事也按人但知韋應物性高潔不知
其少年放恣如此且以少時一字不識之人竟以詩名
千古亦可異矣

唐李觀无賓集有代人上韋蘇州書云竊以閣下有經
濟之器因敷小人直慙之性不圖行絀時禁坐貽伊戚
舉家十口兒女幼弱寺中僑寄目下絕粒閣下錮繫在

此令吏推責反復憂難詞理俱屈衰髮一夕如經十秋
云云按此則韋蘇州詩格雖高其人品或可議矣

李太白軼事

宋洪邁容齋四筆云李太白上安州裴長史書云昔與
蜀中友吳指南死於洞庭之上白禪服慟哭炎月伏屍
猛虎前臨堅守不動遂權殯於湖側數年來觀筋骨尙
在雪泣持刃躬申洗創裹骨徒步負之而趨寢興攜持
無輟身手遂剜貸營葬於鄂城其存交重義如此又與
逸人東巖子隱於岷山巢居數年不跡城市養奇禽干
計呼皆就掌取食了無驚猜其養高忘機如此而史傳

不爲書之亦爲未盡

韓文公逸事

唐王彥唐語林云韓愈病將卒名羣僚曰吾不藥今將病死矣汝詳視吾手足支體無誑人云韓愈癩死也按此亦曾子之意而世罕知者

柳子厚軼事

唐趙璘因話錄云柳員外宗元自永州司馬徵至京意老錄用請卜者問命且告以夢曰余柳姓也昨夢柳樹仆地其不吉乎卜者曰無苦但憂爲遠官耳夫生則柳刻仆則柳木木者牧也君其牧柳州乎卒如其言

馮宿

明張荳疑耀云韓昌黎文起八代之衰當時委未有能識之者其論佛骨疏宰執疑其同幕馮宿代筆亦是怪事宿浙之東陽人貞元中進士按此則當時馮宿必負文名今則誰知宿邪

裴周南爲飲中八仙之一

國朝錢大昕養新錄云范傳正撰李太白墓碑云時人以公及賀監汝陽王崔宗之裴周南等八人爲酒中八仙子美飲中八仙歌無周南名蓋傳聞異詞按范碑止五人餘三人不知尙有異同否

唐詩人劉方平家世最貴

國朝王士禎居易錄云唐詩人劉方平河南洛陽人家世最貴政會事高祖太宗爲洪州大都督贈戶部尙書封渝國公方平子符戶部侍郎贈司徒八子崇龜崇珪等皆仕宦崇珪子岳後唐吏部侍郎贈司徒子溫叟宋初御史中丞子照贊善大夫燿龍圖閣直學士燿嘗獨對明肅太后謂曰知卿名族十餘世欲一見卿家譜恐吾同宗也對曰不敢后數問度不可免因陞對佯爲風眩仆而出唐中葉詩人後嗣昌盛者莫如盧綸而方平歷五代迄宋科名德業相繼又爲過之按舊唐書高適

傳謂唐詩人達者惟高適此語至今爲口實而如劉方平盧綸等之累世貴盛則世未之知也

王定保士論不齒

宋陳振孫書錄解題云摭言十五卷唐王定保撰定保光化三年進士爲吳融子華壻喪亂後入湖南棄其妻弗顧士論不齒按摭言一書至今猶爲藝林所采掇然莫知王定保之爲人也

直齋書錄解題又有廣摭言十五卷鄉貢進士何晦撰其序言太歲癸酉下第於金陵鳳臺旅舍癸酉者開寶六年也時江南猶未下晦蓋其國入歟今此書惜不傳

矣何晦本作何臨 武英殿本訂正

郭令公之後

宋洪邁容齋二筆云唐人功名富貴之盛未有出郭汾陽之右者然至其女孫爲憲宗正妃歷五朝母天下終以不得志於宣宗而死自是支胄不復振及本朝慶歷四年訪求厥後僅得裔孫元亨於布衣中以爲永興軍助教歐陽公知制誥行其詞曰爾先王名載舊史勲德之厚宜其流澤於無窮而其後裔不可以廢往服新命以榮厥家且以二十四考中書令之門而需一助教以爲榮吁亦淺矣

容齋三筆云近見餘干寓客李氏子云本朝三李相文
正公昉文靖公沆文定公迪皆一時名宰子孫亦相繼
達宦然數世之後益爲蕭條又經南渡之厄今三裔並
居餘干無一人在仕版蓋自世祿之制廢而士大夫之
世守宗祏者固已少矣

按唐人趙嘏經汾陽舊宅詩云門前不改舊山河破虜
曾輕馬伏波今日獨經歌舞地古槐疏冷夕陽多又張
籍法華寺東樓詩云汾陽舊宅今爲寺猶有當時歌舞
樓四十年來車馬散古槐深巷暮蟬愁則汾陽門第在
當時已甚蕭條矣此說本姚夫人詳見春在堂隨筆第

七

小李將軍有二

宋黃休復益州名畫錄云李昇成都人小字錦奴年纔弱冠志攻山水數年之中創成一家之能每含豪就素必有新奇桃源洞圖武陵溪圖青城山圖峨眉山圖好事得之爲箱篋珍明皇朝有李將軍擅名山水蜀人皆呼昇爲小李將軍按宣和畫譜云李思訓官左武衛大將軍畫皆超絕其子昭道同時於此亦不凡故人云大李將軍小李將軍大謂思訓小謂昭道也乃又有此李昇是有二小李將軍矣

兩希夷先生

國朝王士禎居易錄云華山經云羅隱之新淦玉笥山道士來居華山晉天福中賜號曰希夷先生稍在陳搏之前是五代有兩希夷皆居華山也

按尹焞亦賜號和靖處士是和靖先生亦有一也

鄭駱駝

唐韋述兩京新記云懷德坊有富商鄭鳳熾宅鳳熾肩高背曲有似駱駝時人號爲鄭駱駝其家巨富嘗謁見高祖請市終南山山中每樹口絹一匹自云山樹雖盡而臣絹未竭事雖不行終爲貴賤之所驚按宋錢希白

南部新書云元皇嘗召王元寶問其家財多少對曰臣請以絹一匹繫陛下南山樹樹盡臣絹未窮此當是一事而傳者或以爲鄭駱駝或以爲王元寶未知孰是也

韓駱駝

宋司馬溫公涑水記聞云韓通剛愎無謀時人謂之韓瞠眼其子少病偃號韓橐駝頗有智略以太祖得人望嘗勸通爲不利通不以爲意按韓瞠眼之名余已記於叢鈔卷二矣韓橐駝之名世亦罕知者故表出之按今人止知有種樹郭橐駝不知有此兩橐駝也

茶香室續鈔卷四

德清俞樾

韓魏公幕客

宋陳振孫直齋書錄解題云大名集四十卷簽書樞密魏郡王巖叟彥霖撰韓魏公客也又云強祠部集四十卷三司戶部判官餘杭強至幾聖撰亦韓魏公客也在幕府表章書記多出其手

四庫全書提要云杭州志稱韓琦出鎮時上奏及他書皆至屬稿琦乞弗散青苗錢神宗閱之曰此必強至之文也因出其疏以示宰臣新法幾罷是固琦之忠誠惻

恒足以感動人主而至之文章懇摯亦有以助之
祠部集有曾子固序云魏公數薦之朝廷以爲宜在館
閣然未及用魏公旣薨之明年幾聖亦以疾卒

趙清獻公喜薰衣

宋葉夢得避暑錄云趙清獻公好焚香尤喜薰衣所居
旣去輒數月香不滅衣未嘗置於籠爲一大焙方五六
尺設薰爐其下常不絕煙每解衣投其閒按人知荀令
君所至香氣三日不滅不知趙清獻亦爾也

儂智高亦科舉之士

國朝王士禎居易錄云黃巢張元之事人皆知之貴耳

集云儂智高發三解不得志遂作亂兩廣遂有兩解試攝官之格

蔡京心胸記字

宋洪邁容齋三筆云蔡京死後四十二年遷葬皮肉消化已盡獨心胷上隱起一記字高二分許如鐫刻所就按此與唐李林甫有仙骨事正相類

蔡卞爲木叉後身

宋張師正閑窗括異志云蔡元度舟次泗州僧伽吐光射其舟萬人仰瞻士大夫知元度不起矣至高郵而沒世言元度爲木叉後身云

秦檜自詭爲諾詎羅轉世

國朝戴咸弼東甌金石志靈峰洞題記殘字下引雁蕩詩話云東甌遺事載秦檜嘗夢至一洞羣僧環坐後經雁山羅漢洞詭云我前夢抵此石室羣僧環坐曰尙憶此否吾瞿然悟身爲諾巨羅僧謂吾世緣未了姑去今覩此始知所夢因築了堂爲詩以記有欲了世緣那得了句此刻所記曰恍符宿夢曰訂出家緣與檜語吻合疑爲老秦手筆年月後尙有一行文已磨滅或卽檜姓名爲後人所深惡而鑿去之邪按秦長腳此事知者殊少諾詎羅亦作諾詎那雁蕩開山之祖雁蕩志引西域

書云第五位尊者諾詎那大阿羅漢居震旦東南大海
際雁蕩山卽其人也。不謂千載之下乃爲秦檜所依託
辱矣。

韓王騎驪

宋洪邁夷堅甲志云紹興中韓郡王旣解樞柄逍遙家
居常頂一字巾跨駿驪周游湖山之閒以私童史四五
人自隨按世傳韓蘄王騎驢事余據齊東野語辨其是
驪非驢已載於叢鈔卷三矣讀夷堅志又得此一證

張循王老卒

宋羅大經鶴林玉露云張循王游後圃見一老卒卧日

中斷之曰何慵眠如是卒起聲喏對曰無事可做只得慵眠王曰汝會做甚事對曰諸事薄曉如回易之類亦粗能之王曰汝能回易吾以萬緡付汝對曰不足爲也王曰付汝五萬對曰亦不足爲也不能百萬亦五十萬乃可耳王壯之予五十萬其人乃造巨艦極其華麗市美女能歌舞音樂者百餘人廣收綾錦奇玩珍羞嘉果及黃白之器募紫衣吏軒昂閒雅若書司客將者十數輩卒徒百人樂飲逾月飄然浮海去逾歲而歸珠犀香藥之外且得駿馬獲利幾十倍時諸將皆缺馬循王得此馬軍容獨壯問其何以致此曰到海外諸國稱大宋

回易使謁戎王餽以綾錦奇玩爲招其貴近珍羞畢陳
女樂迭奏其君臣大悅以名馬易美女且爲治舟載馬
以犀珠香藥易綾錦等物餽遺甚厚是以獲利如此王
咨嗟嘆賞問能再往乎對曰此戲也再往則敗矣仍爲
退卒老於園中按此卒甚奇海外諸國以貿易爲事自
古然矣此卒稱大宋回易使而往正合其所尙宜其大
有得也若再往仍可得利但其意已倦故不欲耳明三
保太監下西洋一事明代豔稱之然彼猶真奉朝命往
也若此卒者不更奇乎惜其姓名無考也

岳忠武明代再轉世

明朱國禎湧幢小品云安陸州故有岳武穆祠萬厯中
得一碑光澤可照望之有人影甚多其一奇偉豐腴簇
擁而過如此經日眾以爲武穆露形也入夜役卒守之
見一偉丈夫躍出騎白馬冉冉乘雲而上從者數百遙
見天門開一人袞冕迓之而入比明碑上題一詩云北
伐隨明主南征拜上公黃龍已盡醉長侍大明宮余味
之則武穆已轉世爲英國酬此願矣客言英國面白而
肥與魏公徐鵬舉相類徐之生夢武穆到家云當受汝
家供養則武穆在我朝再轉世矣

明沈德符野獲編云徐鵬舉者中山武甯王七世孫也

父奎壁夢朱岳鄂王語之曰吾一生艱苦今且投汝家
享幾十年安閒富貴比生遂以岳之字名之以正德十
二年嗣爵享國五十七年然溺愛嬖妾鄭氏棄長子邦
瑞弗立言官聚劾生平舉動乖舛如此其爲守備時值
振武營兵變爲亂卒呼爲草包狼狽而走全無名將風
概豈輪迴已久失其故吾邪又聞金陵人云鵬舉治圃
白門郊外見一邱立命夷爲平地左右止之不聽比發
之乃宋相秦忠獻墓也大喜剖其棺棄骸水中人謂真
武穆報冤云然成化乙巳盜發秦墓于江甯鎮已有人
記之矣容再詢之

知泱

國朝李衛西湖志引氏族大全云有知泱者好直言岳飛待以賓禮飛死上書訟冤秦檜怒送獄殺之按此人此事知者甚鮮宜表出之

朱晦庵別號

國朝鈕樹玉非石日記云又觀宋本朱子易學啟蒙序後題云雲臺真逸據此則朱子有雲臺真逸之號亦人所罕知

朱晦庵晬日

明張萱疑耀云東坡洗兒詩但願生兒愚且魯無灾無

難到公卿朱晦庵生其父松於晬日亦作詩行年已合
識頭顱舊學屠龍意轉疏有子添丁助征戍肯令辛苦
更冠儒二公皆一意也按坡詩人皆知之朱詩則罕知
者然晦庵竟爲大儒非乃父所及料矣

兩呂東萊

宋陳振孫直齋書錄解題云東萊集二十卷外集二卷
中書舍人呂本中居仁撰希哲之孫好問之子而祖謙
之伯祖也按今人止知有呂祖謙東萊集四十卷至呂
本中之東萊集則知者罕矣祖謙之弟祖儉等編次其
集乃與伯祖之集同名何也本中尙有紫薇襍說一卷

四庫全書著錄又有師友稊志一卷未著錄今並刊
入湖州陸氏叢書

張清割眼

宋吳曾能改齋漫錄云大觀二年鄧州南陽東海村有
張三婆患雙眼疼痛昏暗不覩光明其子張清用左手
提出眼睛將銅針穿過用小刀子割下眼睛與母喫了
自後所患眼睛不曾再發疼痛朝廷有旨特補太醫助
教不理選限按此視刳肝割股更奇矣

文文山弟

宋文文山指南後錄有聞季方至一首云去年我別旋

出嶺今年汝來亦至燕弟兄一囚一乘馬同父同母不
同天可憐骨肉相聚散人生不滿五十年三仁生死各
有意悠悠白日橫蒼煙按此卽所謂南枝向暖北枝寒
者也文山以三仁生死爲解則亦不甚以弟爲非矣
又先母兩國夫人哀辭云二郎已作門戶謀江南葬母
麥滿舟不知何日歸兄骨孤死猶應正首邱觀此則知
其弟之降元亦非得已者文山且以歸骨望其弟矣

熊飛將軍

國朝黃子高粵詩蒐逸載宋人李春叟有送熊飛將軍
赴文丞相麾下詩按熊飛將軍惜未知其姓名文山部

曲有此人亦宜表出之也

張千載

明楊慎升庵集云張千載字毅甫廬陵人文山友也文山貴顯屢以官辟皆不就文山自廣還至吉州城下千載來見曰丞相赴京某亦往遂寓於文山囚所側近日以美食奉之凡留燕三年潛造一櫬文山受刑後卽藏其首仍尋訪文山妻歐陽夫人於俘虜中俾出火其屍拾骨寘囊并櫬南歸付其家葬之按信國有此死友世罕知者宜表出之

劉榮

宋文文山指南後錄云從者七人或逃或死或逐今僅存一人曰劉榮按劉榮爲文山從者世罕知之又有孫禮文山命其馳歸以文告祖禰以詩別諸友而孫禮竟不曾往則其人不足道也

黃子久本姓陸

國朝黃崇簡冬夜筆記云黃子久姓陸依常熟之黃遂易姓

丁鶴年不姓丁

元戴良九靈山房集有高士傳爲鶴年作曰鶴年西域人也曾祖阿老丁祖苦思丁父職馬祿丁又有從兄曰

吉雅謨丁按鶴年不言何姓而自曾祖以下其名末一字皆丁字不知何義世遂以鶴年爲丁姓非也

國朝錢大昕補元史藝文志有丁鶴年撰集一卷哀思集一卷方外集一卷續集一卷亦誤以鶴年爲丁姓也

趙廣

國朝王士禛池北偶談云趙廣合肥人李伯時小史伯時作畫常令侍左右久遂善畫尤工畫馬幾亂真遭亂爲賊脅之作畫不肯從祈其右手力以左手畫大士宋南渡士大夫家所藏伯時大士多是廣筆按此與沈石

田儼朱太平可相伯仲而趙廣不爲賊作畫其風節尤足多也

沈含馨王無競

明楊慎升庵外集云水經注後魏中書舍人沈含馨書洛陽宮殿榜今書譜不載姓名

又云金燕都宮殿寺廟及汴京諸榜古今第一皆王無競書

宋景濂曾爲道士

元戴良九靈山房集有送宋景濂入仙華山爲道士序云金華宋景濂先生當至正中嘗以翰林國史院編修

官徵之固辭不赴後竟寄迹老子法中入仙華山爲道士又云先生名濂其字景濂今易其名曰元貞子署其號曰仙華道士

按明史宋濂傳但云元至正中薦授翰林院編修以親老辭不行入龍門山著書不言爲道士

郭子興本姓陳

明夏原吉一統肇基錄云郭子興本姓陳元末有陳某者不知何許人精識緯候知王氣在東南徧游閩廣江黃間亡所遇乃北涉淮泗入塗山之境得之遂止不行假五行命祿求諸陶漁中大姓郭某命觀其家人悉貴

人命也。移及一女。陳曰：公家之貴，悉由此女主人。曰：是乃雙瞽。復問聘者曰：人以瞽弗娶。陳曰：吾未娶，誠能歸之。當得貴子。主人遂納爲壻，生四男。一卽滁陽王也。按此郭子興實陳姓，郭乃外家姓也。明史郭子興傳則云：父郭公，少以日者術遊定遠。邑富人有瞽女，無所歸。郭公乃娶之，生三子。子興，其仲也。與此不同。未知孰是。夏原吉以明人紀明事，或當有所本乎。

馬三

明王達椒宮舊事云：皇后馬氏，本宿州馬三之女。馬三以忿爭殺人，恐犯於法，移家定遠。及天下亂，乃挈皇后

母避兵他所而以皇后託郭子興按明史外戚傳馬公失其名并其行第亦不著此可補史之闕

梅梢

明董穀碧里襍存云梅梢者聖祖高皇帝鏖戰鄱湖時御舟黃帽也吳人謂舟子爲梢子其人梅姓故云時聖祖御舵樓僞漢有舉流矢相向者梅梢急徹御座甫倒於舟中而流矢及矣登極後大封已畢獨不及梢時梢目已失明候郊天駕回令其孫扶之路傍大呼曰皇帝忘梅梢乎上大驚卽日厚加錫予以其孫尙公主云按明史太祖十六女甯國公主下嫁梅殷成字伯殷汝

侯思祖從子也又考梅思祖傳思祖夏邑人初爲元義兵元帥叛從劉福通尋棄福通歸張士誠徐達兵至迎降然則梅梢之說殆不足信

劉青田異事

國朝趙吉士寄園寄所寄云青田山中有異劉伯溫隱居時山忽開石門進之見石壁有字曰山爲基開取石擊之石門又開進入內有道士枕書卧乃兵書也曰明日能熟之吾當授汝明日果熟遂授以兵法少時讀書寺中僧房有一異人每出神去鎖門或一月半月偶有北來使客無房可宿見此空房擊開之曰此人死矣可

連焚瘞我住之僧不能禁遂焚之其人神返無可復生
每夜啼呼曰我在何處基開窗應曰我在此神卽附之
聰明增前數倍天文兵法一覽洞悟按此事甚怪前一
事猶不失爲張子房後一事則青田爲靈鬼所憑幾成
爲金聖歎矣

明楊慎升庵集云元至正間上高縣有術士曾義山世
居縣十五里胡廬石畔嘗開卜肆於縣南之橋埠有瞽
而丐者日過肆前義山必禮而與之語或啖之果餌久
之丐者告山曰明日有三人共一目來者有異術君宜
叩之明日果有眇一目者曳杖導二瞽人過肆山隨之

拜於縣北之鷓鴣洲一瞽者曰當以小撓爲誓遂以其書授山且畫沙指訣盡其祕妙其書名銀河棹山後占卜如神邑人皆知預避紅巾賊行掠無所得恨欲殺之隱匿縣西觀音閣得免遂不復行其術密藏其書於胡廬石洞中臨終謂其子曰某月某日有劉姓過吾家取書畀之後劉公伯溫官江西高安果經山家其子如山言授之遂棄官歸青田見太祖於金陵按此又一異說也

沈萬山

明孔邇雲蕉館紀談云沈萬山蘇州吳縣人也家貧無

產以漁爲生一日飯畢就水洗碗碗忽墜水中因撿之不知碗所在但覺前後左右纍纍如石彈乃盡取之有識者曰此烏鴉石也一枚得錢數萬山因以富或曰夏日仰卧漁船上見北斗翻身遂以布欄盛之得一杓及天明有一老者引七人挑羅擔七條而至謂山曰汝爲我守之言訖不見啟視皆馬蹄金也以此致富二說不同山旣富築垣周迴七百二十步垣上起三層外層高大六尺中層高三尺內層再高三尺闊並六尺垣上植四時豔冶之花望之如錦號曰繡垣垣十步一亭以美石青木爲之垣外以竹爲屏障垣內起看牆高出裏垣之

上以粉塗之繪珍禽奇獸之狀襍隱於花閒牆之裏四面累石爲山內爲池山蒔花卉池養金魚池內起四通八達之樓削石成橋飛青染綠儼若仙區樓之內又一樓居中號曰寶海諸珍異皆在焉樓下爲溫室中置一牀制度不與凡等前爲秉燭軒取何不秉燭遊之義軒之外皆寶石欄杆中設銷金九朶雲帳後置百諧卓義取百年諧老也前可容歌姬舞女十數軒後兩落有橋東曰日升西曰金明所以通洞房者橋之中爲青箱乃置衣之處夾兩橋而長與前後齊者爲翼寢妾婢之所居也後正寢曰春宵澗取春宵一刻值千金之義以貂

鼠爲褥蜀錦爲衾毳綃爲帳極一時之奢侈

按自秉燭軒以下皆

說牀之制度

時有一夫一婦流移道路婦懷孕十月已足適

至萬山之門以手扳門環生一女子因名環是夜萬山
得一夢夢一老人謂之曰汝金銀盡是扳環者今當還
之山覺不曉所謂及明乃有此應遂收爲子婦并其父
母養焉女來後家益殷富旣長聰明過人山常與鬪造
一橋新婦先成又規度精緻號曰賽公橋今在秀水縣
平望北境萬山有妻十三尤愛者曰麗娘山嘗與至後
園至探香亭傍有一古梅白萼鮮美娘因脫所著金翡
衫加于樹上曰香則香矣但少茲艷色耳未幾娘亡後

人見月夜梅底一美人著金翡衫時皆謂麗娘精魄也
山思之甚或夜宿梅下或日禱梅間又作恩鎖臺于冢
上置離思碑于中會稽楊鐵崖所製也太祖既定金陵
欲爲建都之地廣其外城府庫虛乏難以成事萬山願
與對半而築同時舉工先完三日太祖酌酒慰之心實
不悅也適萬山築蘇州街以茅山石爲心上謂其有謀
心收殺之血出盡白家財入官新婦先卒其牀施周普
寺爲觀音牀又金留殿十三隻牀乃萬山之妻所用者
皆極精巧蘇州九里石塘萬山所築銅橋萬山所造按
沈萬山至今婦豎知名而罕有能詳言其事者此書所

述獨詳儻有好事者竟可敷衍成一傳奇矣

明郎瑛七修類稿云國初南都沈萬山秀者甚富今會同館是其故宅後湖中地是其花園京城自洪武門至水西門乃其所築太祖欲殺之太后苦諫乃得流雲南其壻余十舍亦流潮州今聞二家子孫尙富乃點化之術也詳近峰聞畧

明蔣一葵長安客話云工部有銅匱四一在節慎庫高可過人云是國初籍沒沈萬山家物又光祿寺有鐵力木酒榨每榨或用米二十石得汁百甕亦云是萬山家没入者

國朝趙吉士寄園寄所寄云女學士沈瓊蓮烏程人世傳富民沈萬三之後有廷禮父子皆仕於朝沈以父兄之素得通籍掖廷弟溥官通判是沈萬山之後亦頗有達人

明劉昌懸筭瑣談云沈萬三家在周莊破屋猶存亦不甚宏壯殆中人家制耳惟大松猶存焉被沒者非萬三家蓋萬四之在黃墩者耳按萬四未知何人殆萬三之弟邪

國朝高士奇天祿識餘云沈富字仲榮行三人因以萬三秀呼之元末富甲江南其弟貴以詩諷云錦衣玉食

非爲福檀版金尊可罷休何事子孫長久計瓦盆盛酒
木棉裘萬三不聽貴遂隱於終南不知所終按此則沈
萬三之弟所見殊高所謂萬四者未知卽此人否

又高氏此條有注云洪武初每縣分人爲哥畸郎官秀
五等家給戶由一紙哥最下秀最上每等中又各有等
鉅富者謂之萬戶三秀如沈萬三秀乃秀之三者按沈
萬三之名熟於人口至萬三秀之名則世罕聞也

國朝褚人穫堅瓠集引客坐新聞云嘉定安亭萬二元
之遺民也富甲一郡有人至京師回二問何所見聞曰
皇帝有詩云百僚未起朕先起百僚已睡朕未睡不如

江南富足翁日高丈五猶擁被二歎曰兆已見矣不去
難將及以其貲付幹僕買舟載妻子泛湖湘而去不一
年江南大族以貲籍沒獨萬二令終萬二又不知何人
也

方遜志被誣

明鄭曉今言云彭惠安公哀江南詞敘述建文死義之
臣至方遜志乃云後來奸佞儒巧言自紛飾叩頭乞餘
生無乃非直筆蓋指西楊輩修實錄方再三叩頭乞生
者非實事也

程濟

國朝錢大昕養新錄云永樂四年二月辛巳唐府長史程濟韓府長史司典簿魏居敬犯夜禁兵馬司請送法司特命宥之此與世所傳建文從亡之程濟未知是一人否

按明張芹備遺錄載程濟事云洪武間爲四川岳池縣儒學教諭岳池去朝邑數千里寢食俱在朝邑而日治岳池學事不廢然則程濟從亡之後或仍曳裾王門以自掩其迹未可知也

野仙

明劉定之否泰錄云元順帝之後世數莫考其君立於

宣宗時者名普花丞相二人曰和甯王阿魯台曰順甯王脫懽二人死脫懽之子曰野仙悉有二人部屬號爲太師按明史作也先此作野仙譯音之異知者鮮矣明皇甫庸近峯記略云英宗土木之變幾不免矣也先之母告其子曰吾蘇州人少隨夫戍邊被汝父擄回與之生汝吾念昔居中國爲今天子臣臣無殺君之禮跪且泣以請也先從之英宗得還按也先之母蘇人亦世所罕知者

沉太守

明楊循吉吳中故事云沉公鍾江西人實姓黃氏蘇州

知府缺楊文貞公以公薦公知蘇州有內官請賜敕書以行文貞難其事不敢直言乃以數母字假之以柄按世稱況公守蘇奉有敕書據此則亦非特敕也

明史本傳則云賜敕以道之又云鍾之後李從智朱勝成奉敕從事則是實有敕書矣

史不言其本姓黃然鍾字伯律則疑其名本當作鐘黃鍾律名其名依姓取義故字伯律也黃況二字北音本同改黃爲況改鐘爲鍾當必有故今不可考矣

明沈德符野獲編云鍾抵任之次年奏吳縣縣丞趙瀄闖茸無能起送至京其民千八百餘人訴於巡撫侍郎

戒均周忱言濬守法奉公愛民集事因本府經歷傅得有求不遂因譖於知府上命按臣核之果如民言命濬復職置得於法都察院請治鍾妄奏之罪上曰此爲得所欺但失之不察耳姑記其過仍戒鍾加愼然則鍾固一輕聽躁動人也吳人以其異途健吏能仰豪強譽之過情流傳至今不衰耳按況清天之名至今猶存不知當日乃有此論

海忠介被糾

明沈德符野獲編云海忠介一時人望吏科給事中戴鳳翔獨疏參之至發其爲南京卿寺時妻妾相爭二人

同日自縊又云瑞出京師用夫三十餘名德州而下用夫一百餘名昨年差祭海神假稱勅訪民事恐嚇當路直至本鄉雖柴燭亦取足有司擡轎徑入二司中道致夫皂俱被責三十尙不愧悟按以海剛峯之清介而當時猶有此劾沈氏載之轉以爲所指皆實事然則是非豈有定邪

野獲編補遺又載房寰疏攻海忠介云居家九娶而易其妻無故而縊其女今瑞已耄而妻方艾人欲固無所不極女旣殺而子亦無天道或不可盡爽也

國朝周亮工書影云相傳海忠介有五歲女方啖餌忠

介問餌誰與答曰僮某忠介怒曰女子豈容漫受童餌
非吾女也能卽餓死方稱吾女女卽涕泣不飲啖家人
百計進食卒拒之七日而死按此卽忠介殺女之說所
自來也

劉瑾姓箕

國朝周亮工書影云劉瑾本姓箕生于馬嵬坡卽楊妃
葬處也

嚴世蕃非介溪子

明沈德符野獲編云初聞故老云世蕃非介溪子余未
深信及聞趙浚谷中丞爲吏部郎中王與齡行狀直云

世蕃爲螟蛉子則分宜固無後也

又云世蕃肥白如瓠但短而無項善相者云是豬形法當受屠

嚴世蕃曾孫

國朝王夫之識小錄云封贈之制極嚴在嶺外時誥勅濫矣然嚴雲從以漚從功封伯應贈四代而嚴世蕃其曾祖也所部覈而不予

楊慎後身

國朝陳寅清榴龕隨筆云張文通館於莊氏草稿皆作細楷時子相已死矣張以有明一代理學諸儒無人作

傳故勉應之亦不虞其至是也聞其膝上有淡墨痕成
都楊慎四字按張交通亦死於南潯莊氏私史之獄者
所云子相卽莊廷鑑也張交通吳江人名雋著有西廬
詩草豈升庵後身邪

唐伯虎逸事

明郎瑛七修類稿云同郡唐寅字子畏嘗記九仙祈夢
夢人示以中呂二子後訪同邑閣老王鏊於山中見其
壁間揭東坡滿庭芳詞下有中呂字驚曰此吾夢中所
見也誦其詞有百年強半來日苦無多之句默然歸家
疾作而卒年五十三

阜隸葉雲

國朝徐逢吉清波小志云甲辰七月王先生被執至武林九月七日就義從者二人同死焉自注云阜隸葉雲侍者冠玉按王先生卽張蒼水也當時諱之故曰王先生考觚牘所載從蒼水死者一姓羅一姓楊此乃云葉雲冠玉知之者罕故表出之一阜隸耳乃得流芳後世此與桃花扇傳奇所載徐公子之爲阜隸者同一阜隸而薰蕕異矣

五七九

明于慎行穀山筆塵云游七宋九卽梁氏之秦宮霍家

之馮子都也一時侍從臺諫多與結納密者稱兄弟一
二大臣亦或賜坐命茶呼爲賢弟九之聲勢稍不及七
而能作字頗爲主人代筆其富又過於七求其所以得
寵者皆食桃之歡也同時有王五者文雅不及七而富
次之第其主人未甚當事且以清謹爲名不大烜赫耳
東海漁人作五七九傳志之

按七九皆張江陵之僕游七卽游守禮號曰楚濱者也
王五則未詳其主人爲誰耳

七子八犬

明于慎行穀山筆塵云萬曆甲申長安有七子之目萬

厯辛卯長安有八犬之目皆時相入幕之賓也按明史
率輔年表萬厯十二年甲申首輔爲申時行十九年辛
卯首輔爲許國萬厯時八犬可與天啟時五虎五彪並
傳矣

左蘿石之僕

國朝張爾岐蒿庵閒話云左蘿石先生盡節後兩僕奉
其遺燼而南史閣部迎之淮上命之衰經主喪閣部諸
公哭弔成禮兩僕一名羅質一名朱敬

韓默

國朝王巖異香集有文適韓君傳云韓君默字文適善

書督師史公可法駐兵揚州謹重國書求法書最善者
君名聲絕出督師延致軍門文武咸集君攝衣冠督師
以賓禮見君援筆點畫盡二王眾皆異焉督師欲官之
辭去按韓君盡室死揚州之難非徒以書名者其爲史
閣部書國書惜言之不詳余意必史公上攝政王書也
此書爲王綱所作余已記於春在堂隨筆今觀此傳則
又知此書爲韓默所書不可不記也

吳梅村王漁洋別號

國朝葉名澧橋西襍記云予得歸文休昌世墨竹卷後
有吳梅村跋自署大雲居士又王漁洋號詩亭逸老見

程哲所刻蓉槎蠡說序

陸晉

國朝汪曰楨南潯鎮志按語云香祖筆記觚賸聊齋志異等書記吳六奇事大同小異惟吳騫拜經樓詩話據查繼佐所作敬修堂同學出處偶記云己亥余客長樂潮鎮吳葛如以厚幣邀余至其軍又云世相傳余初有一飯之德葛如方布衣野走懷之而思厚報其實無是事也因謂出於傳聞之誤或以其既貴而爲之諱皆未可定今考秀水沈起記丐夫陸晉事云武林畏吾寺山門之側有異人焉喜爲乞姓名不傳破袋竹筒每挂書

一卷倚徙市門出書朗誦見者笑之東山查伊璜先生
曾敘其事云庚午余就秋試寓寺中偶出見丐異之急
前揖丐丐遂抗禮不下曰世無知我公等差可與言余
固懇請釋丐而偕吾游爲之櫛髮濯體解衣飾之問其
姓氏家世不答因從同丐者得其故係新安世族陸晉
也余同人中董治升頗饒於貲乃迎養晉於治升家強
之就童子試得高掇及再試僞赴而野脫主人供奉甚
豐終不樂也乃謀於余余曰君家多大紀綱勉集一鄉
塾請晉爲塾師出入民間可自便晉欣然從之值寒食
晉假館事過東山草堂索余詩稿而去至重九余過治

升家訪晉治升曰晉昨晨起不告我竟去不取修脯棄其衣履并東山詩稿亦隨之去矣是後西北多事傳聞不一或云自浙而楚而豫而燕出關東遂爲瀋陽人竟不知所終及東山累於潯案拘繫司寇相傳有於旗員之側白先生寃者以是對簿時筆帖式下階向先生問安先生漠不解何意及留北司火房復有人傳語云公幸無恙前所借詩稿尙在也而晉卒不見東山吳越人皆傳吳潮陽六奇非也起爲繼佐門人所記似當得實按吳六奇一事至今豔稱之不知有陸晉之說故詳錄之

陳士慶

國朝趙吉士寄園寄所寄云陳士慶河南鄧州人學書不成去學百工之技不樂也出游名山入函谷關至終南有老人籜冠羽衣坐石洞中士度跪拜於洞口求神仙之術老人曰若徧體皆凡濁豈神仙中人邪士慶跪拜果日一日老人命童子予一物若飴食之遂不復饑又累日出一卷書授之曰去求仙非汝事也視其書皆不省惟末四頁頗識之皆禁方也歸至河南巡撫之女鞦韆墜地折足以其方試之立愈乃挾百金以歸父母曰兒得毋從賊乎士慶自言得異書父怒奪而焚之士

慶急從火中掇拾僅存末四頁居有頃羣賊破鄧州士
慶爲張獻忠所虜獻忠性凶殘每以大槌撻左右輒死
死或付士慶治之皆立起軍中呼爲老神仙獻忠死士
慶遨遊孫可望李定國閒定國死隨其養子白某入邊
投誠病死按老神仙事他書多有紀之者此有姓名且
詳其始末視他書爲備故具錄之

文三郎夫婦

國朝王士禎池北偶談云米侍講漢雯言前令建昌縣
有縣署水夫文三郎者頗文雅不類俗人一日見家僮
輩兩素扇一畫梅一畫蘭竹又書唐人絕句二首問之

卽文三郎妻徐蓉所作年才二十三

又云宋中丞牧仲言睢州湯氏有傭工人某者夫婦傭其家數年每聞主人與客談詩文輒竊聽一旦扃門去留書千言文詞博奧自敘悲憤援據古今多出意表竟不知爲誰河也按以此兩夫婦觀之知古來所盛傳梁孟風流未始不可求之今人中矣

吳鼇

國朝熊寶泰藕頤類藁云吳鼇髯髮工桐城鍾惺鎮人余不知其能詩也嘉慶壬戌余在涪縣濟人官貴池者刻其詩以傳始知之詩筆秀詞清老於聲律者余最喜

其微軀病轉尊之句改爲壓卷而再刻之按刀鐸之工自古有之至本朝功令男子皆髻髮髻髮之工遂徧天下而此中遂有詩人惜未得其遺集而讀之也

國朝王士禎池北偶談云米紫來漢雯言知長葛縣時有剃髮侍詔名羅漢者家衛輝貌甚寢究極音律雖吳中曲師不能過時癸丑會試其孟子題爲盡其心者一節米歎其難羅漢爲闡發傳注名理燦然又曰此章與宗門某某公案相發明因引諸尊宿語錄如翻水米益奇之扣其所學頗記唐人詩數百篇亦曉篆隸自言有母妹在河北今辭公去當復來一別卽往五臺不歸矣

後亦竟不復至焉按此人更不可測其所學當又在吳
鼈之上矣